

van zijnen *affinis* Alb. Busius, denkelyk Buys, en mede een Amersfoorder, te Dusseldorp te hebben uitgeoefend; want zij zijn het, bij welke de eerste druk van het beroemde catechetische werk van Monheim, in 1560 in 8°. het licht zag, die voor mij ligt:

« *Catechismus etc. Dusseldorpii excudebant Joh. Oridryus et Albertus Busius affines anno 1560.* »  
Of en wat nu deze Oridryus weer te maken heeft, met den gelijknamigen leeraar aan de Dortsche school in de XVI eeuw, wiens dood door deszelfs leerling, Martinus Pilius (achter: *De ambitione carmen...* LB., 1593. 8°. p. 59 sq.) beweend is in een lat. *carmen*, aan (mede zijnen leermeester) Cornel. Rekenaer, weet ik niet. Bij den Heer Schotel II. p. 358 wordt die Dortsche leeraar verkeerdelyk Oxydrius genoemd, een abuijs, dat, helaas, in daarna uitgekomen geschriften blijkt reeds te hebben wortel geschoten.

J. J. DOOR v. FL.

'S RAETS

**MERKWAERDIGHE SLITINGHEN**

1454—1457.

(Vervolg van bladz. 213).

1455. **W**ant Cornelis Hughen sone, *syn vader ende syn stiefmoeder leliken bi nachte ghewont ende gheslaghen heeft*, hieromme is hi ghecomen alhier in hemde ende in broec voor onser clocken ende sel bidden den rude ende sinen

vader, die hier teghenwoerdich staet, daer hy dat feyt aen ghedaen heeft, omme verghiffenisse, ende hi sel wilcoren op syn lyf, dat hi gheen onstanthaftighe saken meer doen en sel in woerden noch in werken op syn lyf, ende hi sel staen opte kaec, ende daerentendens terstont wt onser stat gaen, een beevaert te Romem, ende niet weder binnen onser stat komen noch in den sticht van Utrecht aen dese side der Iselen, ten sy, dat hy die voersz. beevaert te Romem ghedaen heeft, ende onsen rade bethoen brengt, dat hi de beevaert ghedaen heeft ende absolveert is van deser sake voerghenoemt (149).

1455. Want Jan van Guttinge hemselves beliet heeft van twee moerden, die hy ghedaen heeft, ende van een vreulkyn, dat hi onverschult ondadelyk sonder node doet heeft ghesteken, hieromme sel men dat rechten mitten rade an syn lyf als men an een moerdnaer schuldich is te doen (150).

— Want Jan Gheryt Idensz, dat onse borgher is, enen doetslach ghedaen heeft an jonghe Ghysb. Roelofsz sone, dat onse borgher niet en was, heeft hy opter poerten ghelegghen, ende anders ghedaen als hi nae onser stat rechten schuldich is te doen, ende is hier ghecomen in hemde ende in broeke ter clocke, ende sel den rade verghiffenisse bidden ende sel wilcoren op syn lyf, dat hi after deser tyt voirt, binnen der stat ende stats vriheit gheen wapen noch messen draghen en sel dan een broetmesse sonder oirt, noch dat hi des avonts nader neghender ure in ghenen bordelen gaen, staen, noch wesen en sel.

Oec sel hi wilcoren vorder, ghelyc dit bi onsen rade verdraghen is (151).

1455. Want Dirc Backer *hemselven te behelpen pleecht met loghentale ende toverien*, hieromme sel men denselven Dirc merghen *gheselen op-ter plaetse* ende men verbiet hem daerentendens onse stat ende stichte aen dese side der Iselen ewelic op syn lyf (152).

— Want Sweer van Tienhoven *een grote lo-ghentale ende tessinghe den goeden Heren alhier binnen onser stat buten horen schulden overgheloghen ende besiert heeft*, ghelyc hi hem selven nu heeft beliet, daer groete bloetstoringhe binnen onser stat gheschepen was om te komen, en haddt God van hemelryc met syner groter bermhertigheit niet verhoet. Hieromme soe sel men dat *rechten mitten rade* an sinen live (153).

— Want Filips Bernts sone van Wtrecht in desen voerleden jaer wt *onrechten aenbrenghen onse stat met der clocken verboden wert van enen nederlach, dien hy met Egbert van Aemstel den jonghen ende Henr. Trinde aen enen knecht van buten, die oec onse borgher niet en was, op Sint Jans kerchoff ghedaen, van welke nederlach die voersz. Henric Trinde, den voern. Filips claerliken overdraghen, ende den doetslach op hem ghenomen heeft, ende men oec nu inder waerheit bevonden heeft, dat hy des doets van den voersz. knecht claerlyc onschuldich is*, hieromme soe hebben de meene gilden den voern. Filips, wt *gracie ende ter bede ons ghenedighen Heren,*

- onser stat ende sine stemme wederghegheven, in allen schine als hi was, eer hi wtghinc (154).*
1455. Want Gheryt Wynter, Willem Soet, Ja. Stevensz, Symon Jansz ende Matthys Logheneet, met horen medewerkeren, *temael onsechlyc hem ghehadt, ende den oudermans met strenghe woerden ende ghebeerden ter minrebroederen inden cloester aengheghaen ende daertoe ghedronghen hebben, dat si hem terstont optie tyt ghemeen merghensprake legghen moesten, daer si nae inhoud des ghildebriefs de ghemeen gilden grootelyc an ghebroickt hebben, om welker broken wille sy nu en wyltyts opter poerte hebben ghelegghen, hieromme soe syn sy alhier ghecomen in hemde ende in broec ter clocken ende sellen bidden onsen ghenadighen here ende den rade om verghiffenisse, anders nagaende ende te volcomen hoer oervede onses ghenedighen Heren ende de meene ghilden van Utrecht ghedaen in brieven (155).*
1456. Want Jan van Velde Gheryts soen onse stat ende een mile vander stat te bliven metter clocken op syn lyf verboden was, ende daerenboven niet verre buten onsen poirten begrepen is, soe sal men dat *rechten nae onser stat boec metten sweerde an sinen live (156).*
- Want Claes Haec hem beholpen heeft met *transinieringhe, soe sel men dat rechten metten sweerde aen sinen live als een straetschender, mer soe hi oec den luden tot veel tiden thoer ghestolen heeft, soe sel hi wtgaen metten bast als een dief (157).*

1457. Want Reynier die Milde, onse borgher, in voertiden *enen doetslach gedaen heeft an Hildebrant van Jutphaes, sa. ge., die onse borgher niet en was, daer hi doe ter tyt over opter poirten lach, ende voir der clocken was, na behoren, onser stat beteringhe gedaen heeft ende verborcht heeft den doden te zuenen biden rade vander stat, tot wat tiden die maghen ende vrienden, zoene bi den rade nemen willen. Ende want dan Reynier tot geenre zoenen komen en kan buten den rade, soe laet die raet enen ygheliken weten ende ghebiet, dat nyemant den voern. Reynier binnen onser stat ofte stat vriheden en misdoe, in woerden ofte werken, want hem die raet consenteert heeft, die strate te ghebruken binaen onser stat ende stat vriheden, ende yemant, die hem hierenboven misdede, dat woude die raet rechten, als men aen gheleidebrekers schuldich waer te rechten, ende tot was tiden die maghen ende vrienden zoene biden rade nemen willen, sel hem goede beteringe ende bescheit bi onsen rade gheschien ende wederfaren (158).*

*(Het vervolg hierna).*

J. J. DOBT v. FL.